

痢疾論

痢疾論卷之三

諸證二十八門

噤口一

準繩云痢不納食。或湯藥入口。隨即吐出。俗名噤口。多因邪留胃氣。伏而不宣。脾氣滯而不布。故嘔逆而食不得入也。有陽氣不足。胃中宿食未消。則噤而

後學楊太任古儀參閱

黎水孔毓禮以立著輯

同邑陳元節菴全校

未邑陳馥柳田重刊

食不得下者

張石頑主枳實理中加砂仁廣皮木香豆蔻山查麴藥

有肝乘脾

胃發嘔飲食不入縱入亦反出者

石頑戊己丸加木香肉桂有水

飲所停氣急而嘔穀不得入者

石頑曰水飲停聚心下悸動不寧五苓散

加薑汁

有火炎熾內格嘔逆而不得入者

石頑主黃連解毒去黃柏

加枳殼木香

有胃氣虛冷食入反出者

石頑論治在後有胃中邪

熱不入食者

石頑曰胃虛挾熱而嘔逆不食者連理湯

有脾胃虛弱不欲

食者

石頑論治在後

有穢積在下惡氣薰蒸而嘔逆食不得

入者

石頑主大黃黃連瀉心湯加木香

脾胃不弱頭痛心煩手足溫

熱未多服涼藥者此乃毒氣上冲心肺所以嘔而不

食

石頑主甘草湯去大棗易生薑此症胃口有熱不可用溫藥

按張石頑遵正治準繩而代爲之擬治法而歸重于胃氣虛冷脾胃虛弱兩條曰丹溪用人參黃連呷法但石連子真者絕少乃粵中草實僞克大苦大寒予嘗以藕汁煮熟稍加砂糖頻服兼進多年陳米稀糜調其胃氣必效卽石連子之意也古治噤口痢多有黃連者苦而且降不能開提非胃虛所宜大抵初痢噤口爲熱瘀在胃口故宜苦燥若久痢口噤不食此胃氣告匱非比初痢噤口尙有濁氣可破積沫可

驅惟大劑參朮佐以茯苓炙甘草藿木香煨干葛之屬大補胃氣兼行津液乃可耳但得胃氣一轉飲食稍進便宜獨參湯畧加陳皮或製香附緩緩調補兼疏滯氣方爲合劑如茯苓之淡滲木香之耗氣干葛之行津皆當屏除也

朱丹溪用人參黃連粳米薑汁煎湯細細呷之神效如吐再作服之但得一呷下咽便開按此主治濕熱在胃者也楊仁齋用參苓白朮散加石菖蒲以道地粳米飲乘熱調下或用人參茯苓石蓮子肉入些菖

蒲與之。按此主治胃虛者也。戴復菴用治中湯加木香半錢或砂仁一錢。此主治胃寒而氣逆者也。準繩云。在下則纏綿。在上則嘔食。當認其寒則溫之。熱則清之。虛則補之。

按痢疾不食。當初病時。右脉渾渾浮大。或浮弦。胸膈痞滿。乃濁氣上壅也。宜降逆氣。枳朴陳皮枳榔之屬。有火兼連芩木香。有食加查麴。有表症者。合香蘇散。及對症發散藥。脉洪大急滑者。火也。清降之。芩連枳朴之屬。有痰加半夏生薑汁。脉滑嘔者。痰也。二陳湯。

加薑汁。虛加參朮。寒加乾薑。熱加苓連。右脉浮弱。沉細。或緩。胃虛也。異功散加木香。少佐石菖蒲。若脉遲者。胃寒也。理中湯加陳皮。虛而氣逆者。木香異功散。脉沉滑。或右關滯。噎不能食者。有宿食也。香砂枳實麴蘖。或大健脾丸。胃虛挾熱不食者。其脉稍急而無力。橘皮竹茹湯。冷熱不調者。連理湯。凡邪在胸膈。必然痞滿。虛亦痞滿。然總不若實滿之甚也。

周慎齋曰。下痢以胃氣爲本。胃失生長。故惡物而不欲食。無分何物。與之遂獲愈者。胃氣勝故也。○有蟲

痢晝夜不及數度反發熱心下痞悶不能食而嘔其
有晝夜不止百度反脈靜身涼而能食何也曰痢之
邪客于下焦由橫連竟傳大腸原無反熱之理以中
焦無病雖下痢無度不碍飲食惟邪發于中焦由橫
連入胃以胃受病自不欲食也

發熱二

經云下利發熱死此言滯下症也仲景云下利手足
不逆冷反發熱者不死此言傷寒三陰寒症也寒症
嫌于無陽發熱者真陽未瀉故曰不死滯下發熱嫌

于陽亢陰亡元氣無主一任邪氣之充斥必致內外
交困故曰死也丹溪曰經言身熱則死寒則生亦大
概言之必以兼症詳之豈無身熱生而身寒死者

按痢初起發熱多屬外邪其候頭痛身痛畏風寒或

熱或熱寒相兼撤其外邪其熱自退人參敗毒散倉

胡湯加味桂枝湯蔥豉益元散又有濕熱熏蒸發熱

者其狀蒸蒸發熱亦能頭痛但不甚畏風寒或口渴

或汗多其脉滑數不似外邪之淫數弦緊清其內熱

則外熱自微不足深慮也黃芩芍藥湯芍藥湯改定

聶氏方香連丸等選用

最忌先無熱或散之清之下之其熱已退八九日忽又大熱多係陰傷陽亢之候爲可慮耳然審知腸胃熱盛更宜清下者有之復感外邪更宜微汗者有之又有陰虛痢疾熱在午後或夜盛晝輕其脉細急熱甚者亦顯滑數以養陰清熱之藥調之湯劑詳陰虛痢疾門更有過投苦寒攻伐虛陽外擾發熱者其脉空大無根急用溫補收斂陽氣以上諸症未定卽死但對症投劑而大熱終不退者爲必死也有外不甚熱自覺煩熱難支欲去衣卧地者此陰陽離絕之候宜入味地

黃湯十全大補湯然多不救

發厥三

經言痢疾身熱則死寒則生究竟死於發熱者十之二三死於發厥者十常八九蓋痢疾古名滯下陽氣不得宣通而治痢之家知瀉而不知補知寒而不知溫知降而不知升陽氣愈增秘鬱不能分溫四體甚至陽氣敗壞週身冰冷六脉沉細十難救一也予於此症若見四末微清卽慎寒涼常見痢疾將厥必先手足微冷始則時冷時溫次則冷多溫少再則厥冷

而不可治矣。故防厥逆者在寸厥之時。先進溫補。然雖用溫補。亦有時欲厥。但不至于通身逆冷。汗注而或敗症。間有厥回而內有火者。不妨稍加清涼。以平之。若厥未迴。不敢輕用也。至于痢症初起。原係熱滯。未經疏散。清下。或早投補瀉。以至臟腑壅遏。經脈不通。而肢體逆冷。六脈糊塗者。有之。其症必脹痛逆迫。或寒熱舌胎。此則宜投峻攻。或表裏兩解等法。萬無有寒涼疊進。六脈沉細。猶謂之熱厥。猶謂之反兼勝已之化者也。然予於痢症發厥。每不敢投參附。以僥

倖貪功非不欲救人于萬一但恐投劑不效或徒增
煩躁反爲若輩藉口而熱厥之說人愈深信不疑耳
凡痢症脉浮大者不變厥逆沉小者不拘遲數易變
厥逆若四末微清而時熱脉弦浮急者乃外邪未散
非厥也以輕劑散之加減小柴胡湯加味桂枝湯等量寒熱選用手足微
冷其脉滑數有力證顯進迫煩渴痞滿等候四逆散加條芩
枳朴大黃之屬皆可隨症加入若通身逆冷脹滿進迫大柴胡湯兼去半夏
外邪重者防風通聖散去石膏寒涼誤投而厥冷
無陽者縱用參附十難救一若更厥冷煩燥陰陽兩

敗矣。

附案○一涂姓痢下二三日投枳朴青陳芩芍木
香少佐黃連而四末微冷連投建中湯而時冷時
溫連服溫劑數日方得手足全溫痢迸迫脈弦急
改用芩芍而痢稍止又用補氣血藥或清補相間
二旬而安。

痢發厥雖人事了了能行走俱不足恃一涂姓早
間發厥能行走夜忽死○一何姓少年脹痛迸迫
肢體厥冷攻下而厥漸回○按痢疾發厥當溫補

者十常八九。當攻下者十之二三。非症顯進迫痞滿煩渴等候。脉見滑數有力。四逆散中何敢加連芩枳朴大黃之屬。且不但不敢下。卽疏散外邪。必脉弦浮急。然後四末微清。而時熱乃爲表症。方可解表。表之一字。尙當審慎。漫言下乎。三案中宜溫者。投建中而僅得時冷時溫。連服溫劑數日。方得手足全溫。於此悟熱厥之症。必如何姓之脹痛。進迫方爲真熱厥也。

腹痛四

張景岳曰：腹痛有實有熱，有虛有寒。因食積者必多脹滿，堅硬拒按；因火者必多內熱等症；因寒者經曰：痛者寒氣多也，有寒故痛也。凡生冷過度及外受風寒，皆能致痛。因虛者，凡人元氣不足，雖無外因，而中氣不暖，亦寒症也。況瀉痢不止，胃氣既傷，膏血切膚，安能不痛？但察不實不堅，或可揉按，或喜暖熨，或饑不欲食，或胃腕作嘔，不見實熱等證，悉屬虛寒。準繩云：建中湯治痢，不分赤白，新久，但腹中大痛者，神效。其脉急或濇浮大，按之空虛，或舉按皆無力，是

也。石頑曰：肉桂伐肝，和脾最捷。腹痛者，少加以和之。又云：下痢腹痛，脉沉緊無熱症者，先以薑桂之類溫之。後理積滯。上言腹痛之屬乎寒者。準繩又云：下痢膿血稠粘，腹痛後重，身熱不除，脉洪疾者，黃芩芍藥湯。上言腹痛之屬乎熱者。

按痢疾腹中痛者，以芍藥甘草爲主。熱加苓連，寒加薑桂。痛在少腹者，更加吳萸。有積滯者，加厚朴、枳、榔。青陳查麴之屬，胃虛挾滯者，大健脾丸。氣不調者，加木香、青陳、香附、薑白之屬。血瘀者，加桃仁、玄胡、歸尾。